

*El a forma parti di e panel***Tico Croes, invita na conferenccia anual di Caribbean Studies Association**

ORANJESTAD(AAN) -- AVP a duna di conoce cu for dia 23 te 25 di Mei cu a pasa a worde teni e di XV Conferencia Anual di Caribbean Studies Association (CSA).

E organizacion aki segun AVP ta un aglomeracion di tur institucionan academico y exper-tonan cu tin como nan punto di specialisacion e area di Caribe.

Durante e di XV Conferencia Anual aki a resalta e panel cu a trata e punto di estructura estatal den e paisnan no independiente den e area di Caribe. Na e mesa di panel a participa expertonan di e islanan Frances (Guadeloupe, Martinique), Mericano (U.S. Virgin Islands y Puerto Rico), Ingles (Turco & Caicos, Anguilla, British Virgin Islands, Cayman Islands, Montserrat) y Hulandes (Aruba).

Segun AVP, e panel a pone atencion historico di e cuestion di estructura estatal, e diferente opcionnan politico disponible. Ademas hopi enfasis a worde poni riba e necesidad di organizacion di referendum pa asina duna e oportunidad pa e pueblonan por scoge den tur libertad.

Tico Croes di AVP a worde invita como experto internacional na e panel pa no solamente duna un bista di e actual debate aki na Aruba tocante e futuro relacion cu Hulanda, pero tambe como comentarista di e ponencianan di varios panelista.

Den su intervencion Tico a elabora ampliamente riba e cambionan cu a tuma lugar den e ultimo decada den e sistema internacional y nan consecucionan pa e viabilidad di paisnan chikito.

Mara na e aspecto di viabilidad aki, a resurgi conceptonan manera estabilidad y seguridad cu a bira trancedental pa e sobrevivencia di e paisnan chikito. Akinan segun AVP, Tico a duna ehempel na e cambio drastico di Inglatera durante

'87 tocante e politica di decolonisacion.

E cambio aki ta cuadra mas tambe cu e escencia di e derecho di autodeterminacion di pueblonan, esta cu ta e pueblo en cuestion mester scoge si e kier pa keda mantene lazonan estatal cu e pais madre.

E consehero di e Gobierno Britanico na e panel a confirma e ponencia aki. Segun Tico Croes, tur e discusion tocante e asunto di estructura estatal mester focus

riba e meta primordial di tur grupo humano cu ta calidad di bida. Esaki por worde midi pa e oportunidadnan politico (democracia, derechonan humano) y economico (trabao, posibilidadnan pa sigui progresa, etc.).

E experiencia cu e paisnan independiente como un meta riba su mes tabata un punto di salida equivoca. Segun AVP, den un discurso, Prof. Selwyn Ryan di U.W.I. a elabora entorno di e tareanan nobo di e estado Caribense cu ta basicamente igual cu promer cu e periodo cu e paisnan aki a bira independiente.

Tico Croes a mostra e discusion andando na Aruba esta e posicion di AVP pa mantene

Status Aparte y MEP pa bira independiente.

Tico a trece dilanti e pensamentonan hancra den e notanan di AVP "Doño di nos Propio destino" y "Het Statuut: Vrijheid en Zekerheid". El a profundisa riba e cambio di politica Hulandes cu a keda confirma cu e plan Hirish Ballin, cual punto di salida ta similar na idea di Eggar (Ministro Ingles pa Asuntunan di Decolonizacion) cu a bisa "We would not urge them to consider moving to independence, but we remain ready to respond positively when is the dearly and constitutionally expressed wish fo the people".

Segun AVP, mas di 200 experto di henter mundo riba e area di Caribe a atende e conferencia. Tico Croes como experto internacional y Mito Croes como experto estatal ta trahando un buki encuanto ehecutamento di e derecho di autodeterminacion cu referencia na paisnan chikito y en especial Aruba.

Segun AVP, e buki aki pronto lo worde publica na Estados Unidos. E hecho cu Tico a worde invita pa e conferencia aki caba ta demostra e reconocimiento cu e tin internacionalmente. Aruba tin derecho di ta orgulloso di dje.